


CONSILIUM AD EXSEQUENDAM CONSTITUTIONEM  
DE SACRA LITURGIA

---

# NOTITIAE



IANUARIO-APRILI 1965

---

CITTÀ DEL VATICANO - PALAZZO SANTA MARTA

## 2. Quoad alia Sacramenta.

Unicuique Commissioni liturgicae dioecesanæ tribuitur cura aptandi ingenio africano Sacramentalium ritus.

Eorum indagations a Commissione liturgica nationali examinantur et conclusiones ad ratificationem Conferentiae Episcopalis deferantur.

✠ PAULUS Card. ZOUNGRANA  
Archiepiscopus Uagaduguensis

## ZAMBIA

## I. EXITUS INSTAURATIONIS

Relatio haec est brevissima et ad partem septentrionalem nationis Zambiensis tantum se referens. In hac dioecesi Kasamaensi, omnibus informationibus directe a « Consilio » receptis, omnes mutationes tempore debito adhiberi potuerunt. Ordinarii vero in vicinis dioecesibus eisdem orbatu, eas introducere non poterant hoc anno. Respublica Zambia enim valde ab Urbe distat, sed individuas paroecias attingere difficilius est.

In nostra parte mutationes, exceptis mutationibus in Novo Ordine Missae expositis, non erant magni momenti, cum ex Indultis, pro nonnullis annis, lingua vernacula in Proprio et in Communi Missae in usu erat una cum lingua latina. Omnibus duplicationibus nunc suppressis, celebratio Missae facilius ac minus onerosa evadit. De cetero, cum cantus in lingua vernacula nondum approbati sint a Coetu Ordinariorum, preces quaedam ut collecta, *Pater noster* etc. etiam nunc in lingua latina proferuntur.

Recentiores mutationes iam introductae certe favore populi christiani gaudent, ut clare existit in Officiis Hebdomadae sanctae, in lingua vernacula celebratis.

## II. PROPOSITIONES

Nonnulli missionarii ex nostris, ut etiam Praefatio in lingua vernacula legatur aut cantetur, exoptant.

A. BLONDÉ

Vicarius Capitularis Kasamaensis dioeceseos

## DUBIA

*Solutio quae proponitur nullam induit vestem officialem. Solummodo habet valorem orientativum: solutiones enim ex officio publici iuris fient, si casus fert, a competenti Auctoritate in « Acta Apostolicae Sedis ».*

## AD INSTRUCTIONEM

Ad n. 36, d:

38. Utrum norma de omittendis osculis manus et rerum, quae porriguntur aut recipiuntur, vim habeat cum Episcopus celebrat tam forma sollemni quam non sollemni?

*Resp.: Affirmative.*

39. Utrum osculum anuli Episcopi communionem fidelibus distribuentis omittendum sit?

*Resp.: Affirmative.*

40. Utrum celebrans et ministri, res, veluti paramenta, accipientes, osculari debeant?

*Resp.: Negative.*

Ad n. 57:

41. Dicitur « in Missis sive in cantu sive lectis, quae cum populo celebrantur, competens auctoritas... linguam vernaculam admittere potest ». Et in decreto pro quadam natione dicitur « In Missis quae cum fidelium concursu celebrantur ».

*Cum populo videtur innuere ad assistentiam actuosam participantium; dum concursus fidelium haberi potest etiam absque actuosa participatione. Estne hic ultimus casus ratio sufficiens ad adhibendam linguam vernaculam?*

*Resp.: Certissime. Immo, a fortiori, cum passiva adistentia etiam ex hoc capite pendet quod fideles nihil intelligunt, neque de verbis quae*

proferuntur ad altare. De cetero expressiones *cum populo* vel *concurso populi* idem sonant.

Ad n. 78, a:

42. Quaeritur utrum religiosi itinerantes, recitatione choralis divini Officii onerati, teneantur (etiam ut hospites in domo, quae non ad Officium divinum in choro recitandum obligatur) omnes Horas Canonicas privatim recitare?

*Resp.*: Affirmative. Hi religiosi non eximuntur, ratione can. 14, § 1 et 3, ab observatione legum personalium. Lex vero divini Officii, vi Constitutionum religiosarum seu professionis sollemnis ac vi Ordinis sacri, est personalis.

Ad n. 78, c:

43. Possunt Ordinarii religiosi vi art. 97 *Constitutionis* de sacra Liturgia et art. VII Motu Proprio « Sacram Liturgiam » in casibus singularibus et iusta de causa a recitatione Divini Officii dispensare etiam singulas communitates ex toto vel ex parte, aut commutare?

*Resp.*: Negative. Art. 97 *Constitutionis* est obvius: « in casibus singularibus ». Nullo modo agitur de dispensandis communitatibus choro adstrictis. Ideo Motu Proprio « Pastorale munus » n. 24 concessit Episcopis facultatem reducendi obligationem choralem Capitulum. Clare tandem excluditur talis interpretatio in *Instructione* diei 26 sept. 1964, n. 78, c, ubi pro regionibus Missionum peculiare conceduntur facultates, sed « salva disciplina choralis religiosa... iure statuta ».

Ad nn. 80-84:

44. Utrum Officia parva post instaurationem sacrae Liturgiae abolenda sint?

*Resp.*: *Constitutio* art. 98 et *Instructio* nn. 80 ad 84 supponunt existentiam Officiorum parvorum etiam post instaurationem sacrae Liturgiae.

#### AD ORDINEM MISSAE

Ad n. 59:

45. Cum celebrans, in precibus ad gradus altaris, non amplius se signet ad verba *Adiutorium nostrum in nomine Domini*, quaeritur, utrum Episcopus se signare debeat, eadem verba dicens, ad benedictionem in fine Missae?

*Resp.*: Negative, congrua congruis referendo. Nam in utroque casu signum crucis ad verba *Adiutorium nostrum* omittitur, ne bis successive celebrans se signet.

Ad nn. 44 et 45:

46. Utrum diacono, qui in Missa secundum n. 44 et 45 *Ritus servandi* legit aut cantat Evangelium, liceat etiam homiliam habere?

*Resp.*: Affirmative, post debitam, ab Ordinario obtentam facultatem, secundum C. I. C., can. 1342, § 1.

47. Utrum diaconus, qui in Missa lecta secundum n. 44 et 45 *Ritus servandi* legit Evangelium, possit etiam in aliis partibus Missae assistere more diaconali?

*Resp.*: Affirmative.

Ad nn. 44-46:

48. Vidi Missam lectam « versus populum » celebratam, in qua Epistola lecta est a dexteris celebrantis, Evangelium vero a sinistris. Quaeritur, utrum talis modus sit correctus, an procedere debet sensu opposito, sicut fiebat in antiquis basilicis?

*Resp.*: Si unus tantum habetur ambo, omnes lectiones ex eo proferantur. Unicus autem ambo a dexteris vel a sinistris altaris collocari potest, prout, iuxta ecclesiae et presbyterii structuram, magis opportunum videtur.

Si ecclesia duos habet ambones ita quidem exstructos ut unus maior pro Evangelio, alter minor pro Epistola sint constituti, lectiones ex iisdem ambonibus proferantur iuxta cuiusque destinationem.

Si vero duo ambones aequales sunt, aut duo sunt extruendi, Epistola legatur in ambone, qui est ad sinistram, Evangelium in ambone, qui est ad dexteram celebrantis stantis ad sedem in abside ecclesiae, retro altare.

Ad n. 46:

49. Commentaria de Missa cum concursu populi tractantia nil dicunt de Missa, quae celebratur in domibus religiosarum, in scholis pro puellis, etc., quod dolendum est, praesertim relate ad munus lectoris et commentatoris. In genere haberi non possunt pro his officiis clerici in sacris constituti. Sed nil dicitur in rubricis, quod talia munera assumi possunt a laicis? Quid faciendum?